

مرند اۆيکو

Mərənd öykü



سيککه

يآزار: دکتري مير هدايت سيد مرندی

Web address: www.marand-oyku.arzublog.com

Facebook: www.facebook.com/marandoyku

Email: rezaaydin491@yahoo.com

سیککە

دکتر میرھدایت سیدمرندی

علی گوندە کی اوشاق دیلیدی کی ؛ اوخولون بیر گوشە سیندە توموب کیمسە ایله قونوشماسین. اودا بوگون گولوردو و اوبور اوشاقلاریلا برابر اویناییب ، سونجوخلانیردی.

اوخولداشلار؛ بونو گۆروب شاشیرمیشدیلار و زورولا علی دن ، ندنینی سوروشوردولار. علی ایستە میردی جواب وئرسین آما اونلارین ایصراری اثریندە ؛ شاد اولماق ندنینی دئدی .

- " دونن اوخولدان ائوہ گئدرکن ، یولدا بیر قادین آل چانتاسی تاپدیم ، اونو..."

اوشاقلارین بیرى جیحیح اندیب علی نین سؤزون کسدى :

- " اودا پول لا دولو ، آپاردین وئردین آتاوا تا بلکه بیر دولو قارین ییہ سیز..! "

علی کئدرلنپ ، گولمە یینی کسدى:

- " یوخ، چانتادا پول یوخویدی، ایچیندە بیر جیلد ائو سندی و بیرآز قیزیل بویون باغی وسیرغا و بیله زیک واریدی ، کوچه ده کیمسە یوخویدی، چانتانی ائوہ گوتوردوم ، آتام چانتانی گورورکن ، تله سیک گئیم لرین گئیپ منله کوچویه چیخدی . کوچه لری بیریر دولاشدیق ، هرکیمی گوروردوک چانتا ایتیره نی سوروشوردوک حتتا باققالاردان ، آتام دئییردی :

- " ایندی بونو ایتیرنلر راحت سیزدیلار.... "

قان تر ایچیندە ، بیرنچه کوچه دولاشمیشدیق ، بیرکیشی وقادینا توش گلدیک کی موتورویلا کوچه -لری ایفیل-ایفیل آختاریردیلار، آرواد آغلاییردی . بیزی گۆرندە بیزدن چانتانی گۆروب - گۆرمە دییمیزی سوروشدولار. آتام جاواب وئرمە میش چانتانی گورستدی :

- " باخ گۆر بودور...؟! "

آرواد چانتاسینی گوردوکده ؛ آز قالدی چیچه یی چاتلا سین. سوینجدن آغلاماق سسینی اوجالتدی، چانتانی آلیب باغرینا باسدى، سونرا چانتانین ایچینی یوخلادی . هرشئی یئریندە یدی

، بيلميرديلر نه جور تشككور ائتسينلر . بيردن آرواد آل آتيب بويون باغينين بير سيككه سيني قوپارديب منه موشتولوق وئردى.

قايتاندا آتام چوخ راضيدى و گولوردو:

"- اوغولوم هرتاپيلان شئى، تاپانين اولماز، شايد ايتيره نين ، بيزدن ده چوخ لازيمى اولما، آما ايندى بو قيزيل سيككه حلاليندا سنيندير، صاباج اونوساتاريق ، سنه لازيم اولان ملزمه لرى آلاريق..."

على بونلارى دئيندن سونرا، اوخولداشلارى هاميسى بيردن سوروشدولار:

" - هانى سيككه...؟ "

على گوله گوله الينى جييينه آپاريپ، سيككه نى چيخارتدى .

اوشاقلار بيربيرلرينين اوستوندن ؛ بويلانيرديلاركى سيككه نى گؤرسونلر. اوشاقلارين بيرى ، بيردن بيره علينين الينين آلتينا ووردو. سيككه هاوايا قالخيپ فيرلانا – فيرلانا گويه يوكسلدى، سونرا يئره سارى دؤنوب ، شاپيلديلا حووضا دوشدو. علينين اؤره يى تۇكولدو. اينانا بيلميردى . اوشاقلارلا برابر حووضو دؤوره لييه ن دمير بارماقلىقلار ياخينلاشدى . بارماقلىقلار اوجا وكيپ ايدى، آما بيلينمه دى على بير آندا نه جور بارماقلىق لارين آراسيندان اوبور طرفه كئچيب ، حسرتله حووضون سويونا باخيرا!

حووضدا بير شئى گؤرونموردو، فقط سودا قيرميزى باليخلارگيزيديلر. على يئره اوتوروب قولونو سويلا سوخدى . آلى حووضون ديبينه چاتميردى. اوشاقلارين بيرى ، بير اوزون سوپورگه ساپى (دسته) گتيردى. على اونو آليب حووضون ليغلاريني بيربيرينه ووردو. سو ليلله نيب داي بير شئى ، حتتا باليخ لاردا گؤرونمه دى .

اوخولون باباسى نين سسى اوشاقلارى بارماقلىق لاردان اولكوتدو:

" - اورا نيه جوملاشميسيز؟! "... اوشاقلار هر بيريسى بيرطرفه قاچديلار. بابا ، على نى گؤردوكى حووضون قيراغيندا يئره ياتيب اليله سويو آختارير. آجيغلانيب ، چيغيردى: " ايت توخومو! اوردا نئيليرسن؟! بلكه سويلا دوشدون! " على اوتوردو و يالواران گؤزلريله بابايا باخدى.

" - قیزیل سیککم سویا دوشوبدور.... "

بابا آهک تکین آچیلدی :

" - نه سیککه سی ؟!!.. "

اوشاقلار بابایا یاخینلاشمیشدیلا. اون - اون بئش آغیزدان بیرئرده سیککه ناغیلی بابایا یئتیریلدی .

بابا شاشمی بیرحالدا، آچارلاری چیخاریب بارماقلیق لارین قاپیسینی آچیب سویا و علی یه یاخینلاشدی. سو قاب - قارایدی و بیر شئی گؤرونموردو. علی آغلامیردی ؛ آما هر بیرنچه ثانیه دن بیر ، ایچینی چالیردی.

بابا اونو گؤروب اؤره یی یانیب ، یئره اوزاندی . بيله یینی چیرمالاییب ، قولتوغونا قدر سویا سوخدو . اونوندا الی دیبه چاتمادی . چاره سیز آیاغا قالدی .

"- اولسون اوغلوم . ناراحات اولما...دور گئت کیلاسا ..صباحاجان دؤزه ریک تاسو دورولسون ، اوندا سیککه نی تاپاریق ، لازیم اولسادا سویو بوشالتاریخق "

بونو دئییب شالوارینین توپراغینی سیلیب ، علی له برابر انشییه چیخدی . کیمسه دن سس چیخمیردی . زنگ چالیندی. اوشاقلار سیرا دوروب ، کیلاسلارا یؤنلدیلر. علی ده یئرینده اوتوردو، آما گؤزو حیطده واونون حوووضوندایدی .

اونلارین اوخولو ، شوja نظامین ائویدی . شوja نظام مشروطیت زامانی مردین زوردئین حاکیمیدی . بلکه شوja نظام یوزلر دؤنه بو حوووضدا یویونموشدی ، آما ایندی بو حوووض ؛ اونون سیککه سینی اودموشدو. اودورکی اؤره یینده شوja نظاما واونون حوووضونا سوخوشدوروردو . زامان چوخ آغیر کئچیردی. نهایت ده چیخیش زنگی چالیندی .

اوشاقلار هورا چکه - چکه اوخولون قاپیسینا ساری قاچدیلا. آما علی ماوالا ساری گئدیپ ، بیرینده گیزلندی . دقیقه لر دؤزدو تا بابا تمیزلیک ایشلرینی بیتیریب قاپیلاری کیلیدله ییب گئتدی. علی ماوالدان انشییه چیخیب بارماقلیقلارا یاخینلاشیب اونلاردان کئچدی . سو هله دورولمامیشدی . پالتارلارینی چیخارتدی وحوووضا گیردی. پاییز گونلریدی وسو سرینیدی . بدنی

تیتره بیر دی. سو دۇشونه قدر چاتدی . اوچ - دورت درین نفس چکیب ، آغ جیه رینی هاوا ایله دولدوروب باشینی سویا سوخدو و بارماقلاريله بیر - بیر لیغلاری آختاردی.

نفسی کسلینجه ، آباغا قالخیب یئنه هاوا آلیب سویا جوموردو. اون - اون بئش دۇنه بو ایشی تیکرارلادی. علی نین دیشلری هم ؛ سویون سرینلیندن ، همیده قورخودان دیرین - دیرین تیتره بیردی.

هر دۇنه کی الی بوش هاوا آلماغا چیخیردی ، واز کئچمک ایستیردی.آما باجیسی نین یالواران گۆزلری ، گۆزونون اۇنونه گلیردی. باجیسی اوندان قولچاق ایسته میشدی ، اودور کی یینه نفس آلیب سویا جوموردو . دای چوخ یورولموشدو کی بیردن بارماقلاری سیککه نی حیس ائتدی . سیککه نی بیر اوووج لیغلا برابر اوووجلادی . آز قالدی چیچه یی چاتلا سین . سوینجکدن ایسته دی چیغیر سین ، گولسون...آغزینی آچدی کی بیرراحتات نفس چکسین ، سو آغزینا دولوب آغ جیرلرینه ساری یولا دوشدو. چوخ قورخدو . ایسته دی هاوار چکسین ، اویان بویانا آل آتدی . هر یئر زوولداق ایدی . آباغی بیر یئرہ گلمیردی . دنیا باشینا فیرلانیردی . زامانی ایتیرمیشدی. چابالادی - چابالادی نهایت سویون اوزونده حرکت سیزقالدی....

هاوا تازا قارالمیشدی ،اوخولون قاپیسی سسله آچیلیب، بیر نچه کیشی کی هر بیرینین الینده بیر فنر(فانوس) واریدی اوخولا گیردیله . هر یئردن اونجه حوووضون باشینا قاچدیله . علی نین چیلپاق لشی سویون اوزونده گۆزه چارپیردی . علی نین آتاسی هاوار تپه - تپه بارماقلیق لاری آشیب ، سویا دوشدو. لشی باغزینا باسیب ، ائشی یه وئردی. لش بوم بوزویدو. اوووجلارینین بیرى باغلی ایدی . بارماقلارین بیر - بیر آرالادیله . لیغلارین ایچینده ، بیر قیزیل سیککه گۆز ووروردو....